

久在侍藥之中乞勉加慎重以副羣望玉堂亦上劄勸戒 荅曰省劄具悉當勉副焉○備邊司啓曰即接尹暄狀啓因督府催糧初給安州等官米五千六百三十一石續發宣川等官米豆一萬九百四十石貨外加取之數通前後幾於四萬云督府多率遼民仰哺於我今過五載所食公私米糧不知幾十萬石而猶以貨物撥出之故而諉謂無一粒侵奪彼所發之貨非關於我國之用而一國民天半歸於遼衆今年則猶或可支而明年則必不可繼此後督府如或更發貨物辭以本國連年失稔前日所發絲段之價尚未盡償方為未安小邦與老爺義同一家豈必受價助糧計較多少乎寧使我國所給之糧浮於督府所發之貨而勿令督府貨物過於本國輸糧之數有若負債者然而每被侵責云云宜當且該曹之所指以為西邊軍餉兩道一年應捧米豆通共十二萬石除邊兵所食六萬石外應輸督府者亦不下六萬餘石而管餉使所措之數則不在此限前頭三四朔間多般拮据餽餉以待下五道收米輸入之意行會于管餉接伴使等處何如 從之○以李光庭為刑曹判書朴東善為議政府右叅贊閔機為兵曹叅知機為人清白且有善治之名金德誠為大司成閔應恢為持平○夜黑雲一道如氣起自巽方直指艮方○壬寅夜西方有氣如火光